



Socijaldemokratska partija Bosne i Hercegovine
Forum mladih SDP BiH

Socialdemocratic Party of Bosnia and Herzegovina
Youth Forum SDP B&H

ODLUKA O UNUTRAŠNJEM ORGANOZOVANJU

Adresa:

Alipašina 41
71000 Sarajevo
Bosna i Hercegovina

Kontakt:

Telefon/fax: +387 (0)33 563 915
E-mail: info@fomspd.ba
Web: www.fomspd.ba

podmladimo politiku!

Na osnovu člana 27 Statuta Socijaldemokratske Partije Bosne i Hercegovine, usvojenog na 2. kongresu SDP BiH 19.05.2001. godine i Odluke o organizovanju Foruma Mladih SDP BiH, koju je usvojio Glavni Odbor Socijaldemokratske Partije Bosne i Hercegovine, broj 02-222-1/01 od 22.12.2001. godine 2. Konvencija Foruma mladih SDP BiH održana 08.09.2002. godine i 4. Konvencija Foruma mladih SDP BiH održana 19.04.2008. godine
d o n o s i

ODLUKU O UNUTRAŠEM ORGANIZOVANJU FORUMA MLADIH SOCIJALDEMOKRATSKE PARTIJE BOSNE I HERCEGOVINE

I OSNOVNE ODREDBE

Član 1

Forum mladih Socijaldemokratske partije Bosne i Hercegovine (u daljem tekstu FOM) je interesna organizacija mladih u okviru Socijaldemokratske partije Bosne i Hercegovine FOM je otvoren za sve mlade koji prihvataju Program i Odluku o unutrašnjem organizovanju FOM-a. (u daljem tekstu Odluka)

Član 2

FOM kao integralni dio SDP BiH ima za cilj realizaciju širokog spektra raznovrsnih zadataka vezanih za život i rad mladih socijaldemokratske orijentacije u skladu sa Programom SDP BiH i Programom FOM-a, te kulturnim, istorijskim, ekonomskim i političkim posebnostima Bosne i Hercegovine.

Član 3

FOM djeluje prema Programu kroz:

1. Okupljanje članstva radi izgrađivanja razumijevanja, tolerancije i obrazovanja u cilju izgradnje političke svijesti.
2. Predstavljanje mladih socijaldemokratske orijentacije prema međunarodnim organizacijama.
3. Organizovanje i sprovođenje aktivnosti koje doprinose jačanju socijaldemokratske ideje u Bosni i Hercegovini.

Član 4

Rad organizacija i organa FOM-a je u načelu javan. Javnost se u izuzetnim slučajevima, vezanim za raspravu o unutarorganizacijskim pitanjima, može isključiti.

Član 5

Sjedište FOM SDP BiH je u Sarajevu, ul. Alipašina 41, u sjedištu SDP BiH.

FOM posjeduje podračun na računu SDP BiH

FOM ima znak i zastavu. Znak FOM-a čine ruža SDP-a i logotip FOM-a koji ima isti izgled kao i logotip SDP.

Zastava je jednaka zastavi SDP-a sa logotipom FOM-a umjesto logotipa SDP-a. FOM ima svečanu pjesmu.

II ČLANSTVO

Član 6

Članom FOM-a se smatra svaki potpisnik pristupnice, starosne dobi 16 do 35 godine. Potpisivanjem pristupnice, član iskazuje prihvatanje Statuta i Programa FOM-a, te prihvatanje članskih prava i dužnosti. Aktivistom FOM-a se smatra onaj član koji aktivno i dobrovoljno učestvuje u iniciranju, planiranju i provedbi aktivnosti FOM-a. Izuzetno, organi FOM-a mogu i izvan, u prethodnom stavu navedenih kriterija članstva, zaslužnoj osobi dodijeliti status počasnog člana.

Član 7

Učlanjivanje u FOM se vrši pojedinačno, potpisivanjem pristupnice, a formalno potvrđuje prijemom članske iskaznice.

U slučaju nespojivosti funkcija ili spriječenosti u obavljanju, funkcija se može zalediti uz imenovanje vršioca dužnosti ukoliko nema odlukom predviđene zamjene.

Član 8

Član FOM-a do 30 god. nije obavezan biti članom SDP BiH, ali ne može biti član bilo koje druge političke partije.

Član 9

Prava i dužnosti člana proističu iz njegove opredjeljenosti da se aktivno uključi u ostvarenje programskih ciljeva i statuta FOM-a, a naročito:

- Da aktivno učestvuje u radu organizacije i organa FOM-a i da učestvuje u određivanju programa i sadržaja aktivnosti i načinu njihovog ostvarivanja;
- Da se neposredno angažuje u ostvarivanju zadataka i da odgovara za njihovo ostvarivanje
- Da aktivno i ravnopravno učestvuje u raspravi i donošenju odluka koje su u nadležnosti njegove osnovne organizacije FOM i tijela čiji je član;
- Da predlaže, bira i bude biran u sve organe FOM-a i da učestvuje u odlučivanju o kriterijima za izbor organa FOM-a;
- Da organizacijama i organima FOM-a upućuje prijedloge i pitanja koja se odnose na njihov rad i da na njih traži i dobija odgovore;
- Da posjeduje i iskazuje manjinsko mišljenje, uz prihvatanje cjeline Programa FOM-a i uz poštovanje Odluke i svih odluka organa FOM-a koje se na njega odnose;
- Da prema svojim sklonostima i interesovanjima učestvuje u posebnim društvenim aktivnostima u području nauke, kulture, tehnike, itd. Ili u drugim vidovima interesnog organiziranja omladine uz stalnu težnju ka njihovom razvijanju i omasovljavanju;
- Da se informiše o svim društvenim pojavama u Bosni i Hercegovini i svijetu.

Član 10

Članstvo u FOM-u prestaje: istupanjem i brisanjem iz evidencije. Smatra se da je član istupio ukoliko to izričito izjavi.

Član se briše iz evidencije ukoliko djeluje suprotno Programu FOM-a ili ako grubo prekrši odredbe ove Odluke, te ukoliko i nakon zvanične opomene nastavi sa radom ili ponašanjem koji nisu u skladu sa Odlukom i programskim opredjeljenjima.

Član 11

Opštinska organizacija FOM-a izriče opomenu prije brisanja iz evidencije, a ukoliko član ne postupi prema opomeni slučaj se upućuje na Nadzorni odbor FOM.

Odluka o brisanju iz evidencije člana FOM-a donosi se natpolovičnom većinom glasova članova organa nadležnog za donošenje ovakvih odluka i dostavlja se u pismenoj formi.

III ORGANI I TIJELA

Član 12

Organi FOM su:

- Konvencija
- Predsjedništvo
- Predsjednik
- Nadzorni odbor

KONVENCIJA

Član 13

Konvencija je najviši organ FOM SDP BiH. Održava se svake 2 godine.

Konvencija može biti izvještajna i izborna – izvještajna.

Može biti sazvana i prije na zahtjev više od polovine članova Predsjedništva. Konvenciju sačinjavaju delegati izabrani u opštinskim organizacijama FOM-a, a prema Odluci o izboru delegata za Konvenciju.

Konvencija se saziva najkasnije mjesec dana prije datuma održavanja.

Rad konvencije je regulisan poslovnikom.

Član 14

Konvencija FOM:

- Donosi i mijenja Program i Odluku o unutarnjem organizovanju FOM-a.
- Usvaja izvještaj o radu Predsjedništva, Predsjednika i Nadzornog odbora u periodu između dvije Konvencije
- Bira i razrješava Predsjednika, potpredsjednike, Generalnog sekretara i Nadzorni odbor.

PREDSJEDNIŠTVO

Član 15

Predsjedništvo FOM SDP BiH je najviše tijelo između dvije konvencije. Saziva se najmanje jednom u dva mjeseca ili ranije na zahtjev Predsjednika, Generalnog sekretara ili jedne trećine broja članova Predsjedništva. Rad Predsjedništva je regulisan poslovnikom.

Član 16

Predsjedništvo FOM-a se sastoji od:

- Predsjednika
- Potpredsjednika
- Generalnog sekretara
- Predsjednika kantonalnih/regionalnih odbora

Član 17

Predsjedništvo FOM:

- Upravlja FOM-om između dvije Konvencije
- Donosi dokumente koji određuju rad Predsjedništva
- Imenuje sekretarijat na prijedlog Generalnog sekretara te razmatra informacije o njegovom radu.
- U proširenom sastavu uključuje Sekretarijat
- Donosi zaključke koji su obavezujući za sve organe i tijela FOM-a, te okvirno operativne programe i planove rada

Član 18

Predsjedništvo može raspustiti kantonalnu/regionalnu organizaciju i sazvati Konvenciju te kantonalne/regionalne organizacije sa 2/3 većinom glasova.

PREDSJEDNIK I POTPREDSJEDNICI

Član 19

Predsjednika FOM-a bira Konvencija.

Dužnosti predsjednika su:

- Da predstavlja FOM u javnosti
- Da inicira i nadzire realizaciju odluka donesenih na organima FOM-a.
- Da provodi ostale odluke koje mu povjeri Predsjedništvo

- Predsjednik FOM-a je po funkciji i predsjedavajući predsjedništva. U odsutnosti predsjednika njegove dužnosti obavlja jedan od potpredsjednika kojeg Predsjednik ovlasti.

Član 20

Potpredsjednike FOM-a bira Konvencija. FOM ima pet potpredsjednika iz pet različitih kantona/regija. Pri izboru potpredsjednika mora biti zadovoljena spolna, nacionalna i teritorijalna struktura.

Dužnosti potpredsjednika su:

- Da zamjenjuju Predsjednika u slučaju njegove odsutnosti, a po njegovom ovlaštenju
- Odgovorni su za jačanje organizacije i uspješnost njenog djelovanja prema raspodjeli zadataka koja se usvaja na Predsjedništvu
- Staraju se za obavljanje drugih zadataka koje im povjeri Predsjedništvo

GENERALNI SEKRETAR I SEKRETARIJAT

Član 21

Generalnog sekretara bira konvencija.

Dužnosti generalnog sekretara FOM-a su :

- Obavlja poslove vezane za povezivanje i koordiniranje rada organa i tijela FOM-a
- Zadužen je za unapređenje organizacijske strukture FOM-a
- Odgovoran je za evidenciju članstva
- Predlaže Predsjedništvu sastav Sekretarijata i sadržaj odjela
- Rukovodi radom Sekretarijata
- Predsjedava sjednicama sekretarijata i raspoređuje zaduženja

Član 22

Predsjedništvo imenuje Sekretarijat na prijedlog Generalnog sekretara.

Sekretarijat je izvršno i stručno-operativno tijelo koje broji 6-8 odjela kojima rukovode šefovi odjela.

Član 23

Generalni sekretar predsjedava sjednicama Sekretarijata, utvrđuje dnevni red i predlaže raspored prikupljenih sredstava i zaduženja.

Rad Sekretarijata je detaljnije definisan poslovníkom.

Član 24

Sekretarijat predlaže, sprovodi, prati realizaciju aktivnosti i o istim podnosi izvještaj Predsjedništvu.

NADZORNI ODBOR

Član 25

Nadzorni odbor čine tri člana koje bira Konvencija.

Nadzorni odbor prati rad organa i tijela FOM SDP BIH i daje mišljenje da li je on u skladu s Odlukom o organizovanju i Programom FOM SDP BIH.

Ima vrhovnu nadležnost u slučajevima koji povlače brisanje iz evidencije.

Podnosi izvještaj Konvenciji.

IV ORGANIZACIJSKA STRUKTURA

Član 26

FOM se organizuje na i državnom, kantonalnom / regionalnom, distriktnom, gradskom i opštinskom nivou.

Osnovni oblik organizovanja FOM je općinska organizacija.

KANTONALNE / REGIONALNE ORGANIZACIJE

Član 27

Organi Kantonalne / regionalne organizacije su:

- Konvencija
- Predsjednik
- Koordinacioni odbor

Član 28

Konvenciju saziva Koordinacioni odbor KO/RO FOM ili Predsjedništvo FOM SDP BiH. Konvencija bira predsjednika, 1-3 potpredsjednika i sekretara Usvaja odluku o unutrašnjem organizovanju, poslovnik o radu, program i plan rada na kantonalnom/regionalnom nivou.

Član 29

Predsjednik predstavlja FOM u javnosti i predsjedava koordinacionim odborom te se brine o realizaciji dogovorenih zadataka.

Član 30

Potpredsjednik mijenja predsjednika, po ovlaštenju i brine se o realizaciji zadataka u skladu za dogovorenim raspodjelom zaduženja.

Član 31

Sekretar se brine o koordinaciji aktivnosti sa općinskim organizacijama i stara se o organizacionom razvoju na području kantona / regiona.

Član 32

Koordinacioni odbor čine Predsjednik, Potpredsjednik/-ci, Sekretar i Predsjednici općinskih organizacija FOM SDP na području Kantona / regiona. Koordinacioni odbor definiše, razrađuje i realizira zajednički aktivnosti od interesa Kantona / Regije.

Član 33

Organizaciju Brčko Distrikta BiH (Distriktna organizacija) čine članovi FOM sa područja Brčko Distrikta BiH.

DISTRIKTNA ORGANIZACIJA

Član 34

Organi distriktne organizacije su :

- Distriktna konvencija
- Izvršni odbor
- Predsjednik

Član 35

Distriktnu Konvenciju čine članovi FOM sa područja Distriktne organizacije.

Ukoliko broj članova DO FOM prelazi stotinu, Konvenciju čine delegati iz Osnovnih organizacija SDP BiH.

Konvencija bira Predsjednika, 1-3 potpredsjednika, sekretara i izvršni odbor.

Predsjednik DO FOM se stara o realizaciji dogovorenih aktivnosti na terenu.

Predsjednik predsjedava sastancima IO DO FOM i predlaže plan aktivnosti.

Potpredsjednici mijenjaju predsjednika u odsutnosti, po ovlaštenju i djeluju prema datim zaduženjima na terenu.

Sekretar se stara o evidenciji članstva i koordinaciji rada FOM na terenu.

Izvršni odbor čini 5 - 15 aktivista koji su spremi da se aktivno uključe u definiranje, osmišljavanje i realizaciju aktivnosti na terenu u skladu s planom i programom SDP BIH i FOM SDP BIH.

Usvaja plan rada i podnosi izvještaj konferenciji.

GRADSKJE ORGANIZACIJE

Član 36

Gradske organizacije FOM čine članovi sa područja jednog grada.

Član 37

Gradske organizacije koje djeluju na području grada koji je sastavljen iz jedne općine/opštine konstituišu se kao općinske/opštinske organizacije i imaju status istih.

Član 38

U gradovima koji su sastavljeni iz više općina/opština, po potrebi, radi koordinacije aktivnosti mogu se formirati i Gradske koordinacije Foruma mladih SDP BIH.

Gradska koordinacija bira predsjedavajućeg Koordinacije iz reda predsjednika općinskih/opštinskih organizacija FOM koje djeluju u gradskim općinama.

Svoj rad Gradska koordinacija pobliže uređuje Poslovníkom o radu, a na osnovu ove Odluke.

OPĆINSKE ORGANIZACIJE

Član 39

Organi općinske organizacije su:

- Općinska konferencija
- Izvršni odbor,
- Predsjednik FOM

Član 40

Općinsku konferenciju čine članovi FOM sa jedne općine.

Ukoliko broj članova OO FOM prelazi stotinu, Konferenciju čine delegati iz Mjesnih organizacija. Ona bira Predsjednika, jednog ili dva potpredsjednika, sekretara i izvršni odbor.

Predsjednik FOM se stara o realizaciji dogovorenih aktivnosti na terenu i po funkciji je član koordinacionog odbora KO/RO organizacije.

Predsjednik predsjedava sastancima IO FOM i predlaže plan aktivnosti.

Potpredsjednik mijenja predsjednika u odsutnosti po ovlaštenju i prema datim zaduženjima.

Sekretar se stara o evidenciji članstva i koordinaciji rada FOM na terenu.

Izvršni odbor čini 5 - 15 aktivista koji su spremi da se aktivno uključe u definiranje, osmišljavanje i realizaciju aktivnosti na terenu u skladu s planom i programom SDP BIH i FOM SDP BIH.

Usvaja plan rada i podnosi izvještaj konferenciji.

V FINANSIRANJE

Član 41

Aktivnosti Foruma mladih se finansiraju iz:

- sredstava SDP –a;
- projekata koje osmisli FOM i
- donacija.

VI ZAVRŠNE ODREDBE

Član 42

Ova Odluka stupa na snagu danom donošenja.

U slučaju nedorečenosti odredbi Odluke, analogijom se primjenjuje Statut SDP BIH.

Za tumačenje je nadležno Predsjedništvo FOM u prvom stepenu, a u drugom Nadzorni odbor.

Član 43

U članovima Odluke o unutrašnjem organizovanju ravnopravno i jednako se koriste termini/imenice u muškom i u ženskom rodu.